

ЎЗБЕКИСТОН РЕСПУБЛИКАСИ МУДОФАА ВАЗИРИНИНГ
БУЙРУҒИ**106 Ўзбекистон Республикаси Мудофаа вазирлигининг
олий ҳарбий таълим муассасаларига ўқишга қабул
қилиш тартиби тўғрисидаги низомни тасдиқлаш ҳақида**

*Ўзбекистон Республикаси Адлия вазирлиги томонидан 2015 йил
5 мартда рўйхатдан ўтказилди, рўйхат рақами 2658*

Ўзбекистон Республикаси Вазирлар Маҳкамасининг 2014 йил 3 июндаги 141-сонли «Ўзбекистон Республикаси олий ҳарбий таълим муассасаларига танлаш тартиби ва қабул қилиш қоидалари тўғрисидаги низомни тасдиқлаш ҳақида»ги қарорига мувофиқ **буюраман:**

1. Ўзбекистон Республикаси Мудофаа вазирлигининг олий ҳарбий таълим муассасаларига ўқишга қабул қилиш тартиби тўғрисидаги низом иловага мувофиқ тасдиқлансин.

2. Мазкур буйруқ расмий эълон қилинган кундан эътиборан кучга киради.

Вазир

Қ. БЕРДИЕВ

Тошкент ш.,
2015 йил 2 февраль,
72-сон

Ўзбекистон Республикаси
мудофаа вазирининг 2015 йил 2 февралдаги
72-сонли буйруғига
ИЛОВА

**Ўзбекистон Республикаси Мудофаа вазирлигининг
олий ҳарбий таълим муассасаларига ўқишга қабул қилиш
тартиби тўғрисидаги
НИЗОМ**

Мазкур Низом Ўзбекистон Республикасининг «Таълим тўғрисида»ги ва «Умумий ҳарбий мажбурият ва ҳарбий хизмат тўғрисида»ги қонунларига, Ўзбекистон Республикаси Вазирлар Маҳкамасининг 2014 йил 3 июндаги 141-сонли «Ўзбекистон Республикаси олий ҳарбий таълим муассасаларига танлаш тартиби ва қабул қилиш қоидалари тўғрисидаги низомни тасдиқлаш ҳақида»ги қарорига мувофиқ, Ўзбекистон Республикаси Мудофаа вазирлигининг олий ҳарбий таълим муассасаларига (бундан буюн матнда олий

ҳарбий таълим муассасалари деб юритилади) ўқишга қабул қилиш тартибини белгилайди.

1-боб. Умумий қоидалар

1. Олий ҳарбий таълим муассасаларига номзодларни ўқишга қабул қилиш Ўзбекистон Республикаси Президенти томонидан тасдиқланган Бутлаш режасига мувофиқ Ўзбекистон Республикаси мудофаа вазирининг олий ҳарбий таълим муассасаларига қабул ўринларини ажратиш тўғрисидаги буйруғига асосан амалга оширилади.

2. Олий ҳарбий таълим муассасалари курсантлари контингентини сифатли бутлаш учун:

ҳарбий-профессионал йўналиш;

дастлабки танлаш;

ҳарбий-профессионал танлаш;

тест синовларини назарда тутувчи комплекс босқичма-босқич танлаш амалга оширилади.

3. Олий ҳарбий таълим муассасаларига ўқишга кириш учун номзодлар Ўзбекистон Республикаси Президентининг 2006 йил 14 январдаги ПҚ–257-сонли қарори билан тасдиқланган Ўзбекистон Республикаси фуқаролари томонидан ҳарбий хизматни ўташ тартиби тўғрисидаги низомда белгиланган талабларга жавоб бериши зарур.

4. Ҳарбий хизматчиларни олий ҳарбий таълим муассасалари ва Сержантларни тайёрлаш мактабларида ўқитишга сарфланган бюджет маблағларини давлатга ундириш тартиби тўғрисидаги низомга (рўйхат рақами 2024, 2009 йил 27 октябрь) асосан, номзодлар, уларнинг ота-оналари олий ҳарбий таълим муассасаларига ўқишга киришидан олдин билим юрти раҳбарияти томонидан ўқишни тамомлагач шартнома талабларини бажармаганлиги сабабли, захирага бўшатилиши, шартноманинг муддатидан илгари бекор қилиниши ёки содир этган жинояти учун озодликдан маҳрум этилиши ҳолатларида моддий масъуллиги тўғрисида мазкур Низомнинг 1-иловасига мувофиқ шаклда ёзма равишда огоҳлантирилади.

5. Олий ҳарбий таълим муассасаларига ўқишга қабул қилиш учун Ўзбекистон Республикаси мудофаа вазирининг буйруғи билан олий ҳарбий таълим муассасалари қабул комиссиялари (бундан буён матнда қабул комиссиялари деб юритилади) тузилади ва уларнинг таркиби тасдиқланади.

6. Қабул комиссияларига олий ҳарбий таълим муассасасининг бошлиғи раҳбарлик қилади. Қабул комиссиялари таркибига Ўзбекистон Республикаси Мудофаа вазирлигининг тегишли таркибий тузилмаларининг мутахассислари киритилади.

Қабул комиссиялари қабул йилининг 10 мартдан 1 сентябрга қадар фаолият юритади.

7. Қабул комиссияси раиси — олий ҳарбий таълим муассасаси бошлиғи; қабул комиссиясининг ишини ташкиллаштиради;

қабул комиссиясининг вазифаларини белгилайди;
 кичик комиссиялар таркибини шакллантиради ва тасдиқлайди;
 кичик комиссиялар фаолиятини мувофиқлаштиради ва назорат қилади.

Қабул комиссияси раиси — олий ҳарбий таълим муассасаси бошлиғи ўзига юклатилган вазифаларни бажариш учун ўз ваколати доирасида буйруқлар қабул қилади.

8. Қабул комиссияси таркибида қуйидаги кичик комиссиялар тузилади:
 номзодларнинг ҳужжатларини ўрганиш бўйича кичик комиссия;
 индивидуал-психологик ўрганиш бўйича кичик комиссия;
 номзодларнинг умумжисмоний тайёргарлик кўрганлигини баҳолаш бўйича кичик комиссия;

психофизиологик ўрганиш бўйича кичик комиссия;

ёзма иш (диктант) ўтказиш бўйича кичик комиссия;

компьютер техникасини ва ахборот-коммуникация технологияларини эгаллаб олганлик даражасини текшириш бўйича кичик комиссия.

9. Олий ҳарбий таълим муассасаларига ўқишга киришни хоҳлаган фуқаролар ўзларининг яшаш жойидаги мудофаа ишлари бўйича бўлимларга мазкур Низомнинг 2-иловасига мувофиқ шаклдаги ариза билан, ҳарбий хизматчилар ўз хизмат ўташ жойига мазкур Низомнинг 3-иловасига мувофиқ шаклдаги билдирги билан мурожаат қилади.

10. Олий ҳарбий таълим муассасаларига ўқишга кириш учун аризалар (билдиргилар) қабул йилининг 1 февралидан 1 апрелига қадар қабул қилинади.

11. Олий ҳарбий таълим муассасаларига ўқишга киришни хоҳлаган номзодлар томонидан мудофаа ишлари бўйича бўлимларга қуйидаги ҳужжатлар тақдим этилади:

ариза (билдирги);

паспорт нусхаси;

туғилганлик ҳақида гувоҳнома нусхаси;

чақирилувчининг қайд этилганлиги тўғрисидаги гувоҳномаси ёки ҳарбий гувоҳномаси;

номзод томонидан қўлда ёки компьютерда ёзилган таржимаи ҳол;

анкета;

ўқиш, иш (хизматни ўташ) (агар ўқиётган ёки ишлаётган (хизматни ўтаётган) бўлса) ва яшаш жойидан тавсифнома ҳамда маълумотнома (яшаш жойидан берилган маълумотномада номзоднинг оила аъзолари кўрсатилади);

ота-онасининг иш жойидан маълумотнома (агар ишлаётган бўлса);

ота-онасининг олий ҳарбий таълим муассасасига ўқишга киришига розилик хати;

маълумоти тўғрисидаги (умумий ўрта, ўрта махсус, касб-хунар) ҳужжатлар (асли ва нусхаси) ҳамда рейтинг дафтарчаси (баҳолар табели) нусхаси;

олий ҳарбий таълим муассасаларига ўқишга киришда имтиёزلардан фойдаланиш ҳуқуқини тасдиқловчи ҳужжатлар (асли ва нусхаси);

яқин қариндошлар орасида вафот этганлар бўлса, уларнинг ўлим ҳақида гувоҳномасининг нусхаси;

3 x 4 см ўлчамдаги 6 та фотосурат (бош кийимсиз ва бурчаксиз) ҳамда 4,5 x 6 см ўлчамдаги 4 та фотосурат (бош кийимсиз);

номзоднинг яшаш жойидаги ҳудудий ички ишлар органидан жиноий жавобгарликка тортилмаганлиги ва судланмаганлиги тўғрисидаги маълумотнома (контракт бўйича ҳарбий хизматчилар мазкур маълумотномани тақдим қилиши талаб этилмайди).

Номзоддан айрим ҳужжатларга аниқлик киритиш учун қўшимча равишда зарур ҳужжатлар ва маълумотлар талаб қилиниши ёки тегишли ташкилотлардан сўраб олиниши мумкин.

Номзодлар томонидан ҳужжатларни тақдим этишда паспорт, туғилганлик ҳақида гувоҳнома, чақирилувчининг қайд этилганлиги тўғрисидаги гувоҳнома ёхуд чақирилувчининг ҳарбий гувоҳномаси шахсан кўрсатилади.

12. Олий ҳарбий таълим муассасаларига ўқишга киришни хоҳлаган ҳарбий хизматчилар томонидан ўз хизмат ўташ жойига мазкур Низомнинг 11-бандида назарда тутилган ҳужжатлар билан бирга қўшимча равишда қуйидаги ҳужжатлар тақдим этилади:

олий ҳарбий таълим муассасаларига ўқишга киришга тавсияловчи ҳужжатлар (муддатли ҳарбий хизматни ўтаётган ҳарбий хизматчиларга — ҳарбий бўлинманинг умумий йиғилиши баённомасидан кўчирма, контракт бўйича ҳарбий хизматчиларга эса — ҳарбий қисмнинг аттестация комиссияси йиғилиш баённомасидан кўчирма);

ҳарбий қисмлар (муассасалар) ва бўлинмаларнинг командирлари (бошлиқлари) томонидан берилган илтимоснома.

13. Тегишли шакл бўйича рухсатномани келишиш учун зарур бўлган материаллар белгиланган тартибда расмийлаштирилади.

14. Мудофаа ишлари бўйича бўлимлар, бошқармалар, қўшилмалар ва ҳарбий қисмлар (муассасалар) ҳамда олий ҳарбий таълим муассасалари Вазирлар Маҳкамасининг 2014 йил 3 июндаги 141-сон қарори билан тасдиқланган Ўзбекистон Республикаси олий ҳарбий таълим муассасаларига танлаш тартиби ва қабул қилиш қоидалари тўғрисидаги низомда назарда тутилган ҳарбий-профессионал йўналиш бўйича вазифаларнинг амалга оширилиши учун масъулдир.

2-боб. Дастлабки танлаш тадбирларини ташкил этиш ва ўтказиш

15. Дастлабки танлаш давомида қуйидаги тадбирлар ташкил этилади ва ўтказилади:

ҳужжатларни тўплаш ва ўрганиш;

якка тартибда суҳбатлашиш;

индивидуал-психологик ўрганиш;

умумжисмоний тайёргарлик кўрганлигини баҳолаш;

тиббий кўриқдан ўтказиш.

16. Дастлабки танлаш тадбирлари икки босқичда ўтказилади.

Биринчи босқич фуқаро ёшлар учун — туман (шаҳар) мудофаа ишлари бўйича бўлимларда, ҳарбий хизматчилар учун — ўз хизмат ўташ жойида 1 февралдан 31 мартга қадар амалга оширилади ҳамда ушбу босқичда қуйидаги тадбирлар ташкил этилади ва ўтказилади:

хужжатларни тўплаш ва ўрганиш;

якка тартибда суҳбатлашиш;

бирламчи тиббий кўриқдан ўтказиш.

Иккинчи босқич фуқаро ёшлар ва ҳарбий хизматчилар учун мудофаа ишлари бўйича бошқармаларда 1 апрелдан 31 майга қадар амалга оширилади ҳамда ушбу босқичда қуйидаги тадбирлар ташкил этилади ва ўтказилади:

индивидуал-психологик ўрганиш;

умумжисмоний тайёргарлик кўрганлигини баҳолаш;

такрорий тиббий кўриқдан ўтказиш.

17. Дастлабки танлаш тадбирларида иштирок этадиган номзодларнинг сони чекланмайди.

18. Номзодларнинг хужжатларини тўплаш ва ўрганиш ишлари дастлабки танлаш тадбирларининг биринчи босқичи якунлангунга қадар (31 мартга қадар) амалга оширилади.

19. Якка тартибдаги суҳбат фуқаро ёшлар билан — туман (шаҳар) мудофаа ишлари бўйича бўлимлар бошлиқлари томонидан, ҳарбий хизматчилар билан — ҳарбий қисмлар (муассасалар), бўлинмаларнинг командирлари томонидан ўтказилади. Бунда якка тартибдаги суҳбат номзод ариза (билдирги) билан мурожаат қилган кундан бошлаб 10 кун ичида ўтказилади. Якка тартибдаги суҳбат натижаси бўйича мазкур Низомнинг 4-иловасига мувофиқ шаклда якка тартибдаги суҳбат варақаси тўлдирилади.

20. Номзодларни тиббий кўриқдан ўтказиш Вазирлар Маҳкамасининг 2003 йил 21 февралдаги 95-сонли қарори билан тасдиқланган Тинч ва ҳарбий даврда Ўзбекистон Республикаси Қуролли Кучларида тиббий кўриқдан ўтказиш тўғрисидаги низомга мувофиқ амалга оширилади.

21. Номзодларни бирламчи тиббий кўриқдан ўтказиш мудофаа ишлари бўйича туман (шаҳар) бўлимлари ҳузуридаги тиббий комиссиялар томонидан амалга оширилади ва 1 февралдан 31 мартга қадар давом этади. Ҳарбий хизматчиларни бирламчи тиббий кўриқдан ўтказиш ҳарбий тиббий муассасаларнинг ҳарбий врачлик комиссиялари томонидан амалга оширилади.

22. Номзодларни такрорий тиббий кўриқдан ўтказиш мудофаа ишлари бўйича бошқармалар ҳузуридаги тиббий комиссиялар томонидан амалга оширилади ва 1 апрелдан 20 майга қадар давом этади, ҳарбий хизматчилар бундан мустасно.

23. Соғлигининг ҳолатига кўра олий ҳарбий таълим муассасасида ўқишга яроқсиз деб ҳисобланган ва тиббий комиссиянинг ушбу ҳулосасига норози бўлган номзодлар назорат тиббий кўриқдан вилоятлар муқобил тиббий комиссияларида 1 майдан 31 майга қадар ўтишлари мумкин.

24. Тиббий кўриқдан ўтказиш натижалари бўйича соғлиғига кўра номзоднинг олий ҳарбий таълим муассасасида ўқишга яроқлилиги даражаси тўғрисида хулоса чиқарилади. Мазкур хулоса номзоднинг шахсий ҳужжатлари йиғма жилдига қўшиб қўйилади.

25. Соғлиғининг ҳолатига кўра олий ҳарбий таълим муассасасида ўқишга яроқсиз деб ҳисобланган номзодлар ҳарбий-профессионал танлаш тадбирларига қўйилмайди.

26. Номзодлар билан индивидуал-психологик ўрганиш тадбирлари қабул комиссияси раиси томонидан тасдиқланган режа-жадвал асосида мудофаа ишлари бўйича бошқармаларда қабул комиссияси таркибига киритилган мутахассис-психологлар томонидан уларни психологик тест синовидан ўтказиш йўли билан мазкур Низомнинг 5-илоvasида келтирилган методикага мувофиқ 1 апрелдан 20 майга қадар ўтказилади.

27. Психологик тест синови натижалари бўйича қуйидаги хулосалар чиқарилади:

олий ҳарбий таълим муассасасига кириш учун тавсия этилади;

олий ҳарбий таълим муассасасига кириш учун тавсия этилмайди.

28. Психологик тест синови натижалари бўйича олий ҳарбий таълим муассасасига кириш учун тавсия этилмаган номзодлар дастлабки танлашнинг кейинги тадбирларига қўйилмайди.

29. Номзодларнинг умумжисмоний тайёргарлиги даражасини баҳолаш қабул комиссияси раиси томонидан тасдиқланган режа-жадвал асосида мудофаа ишлари бўйича бошқармалар бошлиқлари белгиланган жойларда қабул комиссияси таркибига киритилган мутахассислар томонидан мазкур Низомнинг 6-илоvasида келтирилган методикага мувофиқ 1 апрелдан 20 майга қадар ўтказилади.

30. Умумжисмоний тайёргарлик даражаси бўйича белгиланган талабларга жавоб бермаган номзодлар дастлабки танлашнинг кейинги тадбирларига қўйилмайди.

31. Дастлабки танлаш тадбирларидан муваффақиятли ўтган номзодларнинг шахсий ҳужжатлари йиғма жилди тўлиқ расмийлаштирилгандан сўнг тегишли мудофаа ишлари бўйича бошқармалар ва ҳарбий қисмлар (муассасалар) томонидан 20 июнга қадар тегишли олий ҳарбий таълим муассасаларига юборилади.

3-боб. Номзодлар билан ҳарбий-профессионал танлаш тадбирларини ўтказиш

32. Қабул комиссияси томонидан ҳар йили 1 июнга қадар ҳарбий профессионал-танлаш тадбирларини ўтказиш муддатлари белгиланган режа-жадвал ишлаб чиқилиб, қабул комиссияси раиси томонидан тасдиқланади ва мудофаа ишлари бўйича бошқармаларга юборилади.

33. Мудофаа ишлари бўйича бошқармалар ва ҳарбий қисмлар (муассасалар) номзодларни режа-жадвалга мувофиқ ҳарбий-профессионал танлаш

тадбирларини ўтказиш муддатлари билан таништиради ва уларни белгиланган муддатларда тегишли олий ҳарбий таълим муассасаларига тўлиқ ҳолда етиб келишларини таъминлайди.

34. Ҳарбий-профессионал танлаш тадбирлари июнь ойида олий ҳарбий таълим муассасаларида ўтказилади.

35. Ҳарбий-профессионал танлаш давомида қуйидаги тадбирлар ташкил этилади ва ўтказилади:

хужжатларни ўрганиш;
психофизиологик ўрганиш;
тиббий кўрикдан ўтказиш;
ёзма иш (диктант);

компьютер техникасини ва ахборот-коммуникация технологияларини эгаллаб олганлик даражасини текшириш;

якка тартибдаги якуний суҳбат.

36. Олий ҳарбий таълим муассасаларига етиб келган ҳарбий хизматчиларга тегишли олий ҳарбий таълим муассасасига ўқишга киришга тайёргарлик кўриши учун олий ҳарбий таълим муассасаси томонидан йиғинлар ташкиллаштирилади.

37. Олий ҳарбий таълим муассасаси қабул комиссияси таркибидаги номзодларнинг хужжатларини ўрганиш кичик комиссияси хужжатларни ўрганишда олий ҳарбий таълим муассасасига тақдим этилган шахсий хужжатлар йиғма жилдларини рўйхатга олади ҳамда уларнинг белгиланган талабларга мувофиқлигини текширади.

38. Психофизиологик ўрганиш мазкур Низомнинг 7-иловасида келтирилган методикага мувофиқ қабул комиссияси таркибидаги психофизиологик ўрганиш бўйича кичик комиссия мутахассислари томонидан ўтказилади.

Психофизиологик ўрганиш махсус автоматлаштирилган психофизиологик комплекслар ёрдамида амалга оширилади.

39. Тиббий кўрикдан ўтказиш Ўзбекистон Республикаси мудофаа вазирининг буйруғи билан тасдиқланадиган тиббиёт мутахассисларидан махсус шакллантирилладиган ҳарбий-тиббий комиссия томонидан Вазирлар Маҳкамасининг 2003 йил 21 февралдаги 95-сонли қарори билан тасдиқланган Тинч ва ҳарбий даврда Ўзбекистон Республикаси Қуролли Кучларида тиббий кўрикдан ўтказиш тўғрисидаги низомга мувофиқ ўтказилади.

40. Тиббий кўрикдан ўтказиш натижалари бўйича соғлигининг ҳолатига кўра номзоднинг олий ҳарбий таълим муассасасида ўқишга яроқлилиги даражаси тўғрисида хулоса чиқарилади.

41. Соғлигининг ҳолатига кўра олий ҳарбий таълим муассасасида ўқишга яроқсиз деб ҳисобланган номзодлар ҳарбий-профессионал танлашнинг кейинги тадбирларига қўйилмайди.

42. Ёзма иш номзодга диктант ёздириш орқали олий ҳарбий таълим муассасаси қабул комиссияси таркибидаги ёзма иш (диктант) ўтказиш бўйича кичик комиссия томонидан мазкур Низомнинг 8-иловасида келтирилган методикага мувофиқ ўтказилади.

43. Номзоднинг компьютер техникаси ва ахборот-коммуникация технологияларини эгаллаб олганлик даражасини текшириш компьютер техникасини ва ахборот-коммуникация технологияларини эгаллаб олганлик даражасини текшириш бўйича кичик комиссия томонидан мазкур Низомнинг 9-иловасида келтирилган методикага мувофиқ амалга оширилади.

44. Якка тартибдаги якуний суҳбат мазкур Низомнинг 10-иловасида келтирилган методика асосида психофизиологик ўрганиш натижалари, ёзма иш (диктант) натижалари, компьютер техникаси ва ахборот-коммуникация технологияларини эгаллаб олганлик даражасини текшириш натижалари ҳисобга олинган ҳолда ўтказилади.

45. Якка тартибдаги якуний суҳбат қабул йилининг 30 июнига қадар коллегиял принцип бўйича, олий ҳарбий таълим муассасасининг қабул комиссияси томонидан ўтказилади.

46. Якка тартибдаги якуний суҳбат натижалари бўйича номзодни Ўзбекистон Республикаси Вазирлар Маҳкамаси ҳузуридаги Давлат тест маркази томонидан ўтказиладиган тест синовларини топширишга қўйиш тўғрисида узил-кесил қарор қабул қилинади.

47. Тест синовлари Вазирлар Маҳкамасининг 2014 йил 3 июндаги 141-сон қарори билан тасдиқланган Ўзбекистон Республикаси олий ҳарбий таълим муассасаларига танлаш тартиби ва қабул қилиш қоидалари тўғрисидаги низом ҳамда Ўзбекистон Республикаси олий ҳарбий таълим муассасаларига тингловчи ва курсантларни ўқишга қабул қилишда тест синовларини ўтказиш тартиби тўғрисидаги низомга (рўйхат рақами 2477, 2013 йил 12 июль) мувофиқ ўтказилади.

48. Умумтаълим муассасаларида бошқа чет тили (испан, араб, форс, дари, ҳинд, урду, хитой, корейс, уйғур ва бошқа тиллар) бўйича ўқиган тақдирда номзод тест синовлари ўрнига Вазирлар Маҳкамасининг 2014 йил 3 июндаги 141-сон қарори билан тасдиқланган Ўзбекистон Республикаси олий ҳарбий таълим муассасаларига танлаш тартиби ва қабул қилиш қоидалари тўғрисидаги низомнинг 3-иловасида назарда тутилган тартибда олий ҳарбий таълим муассасаларида ягона кўп балли имтиҳон тизими бўйича чет тилидан имтиҳон топширади. Ягона кўп балли имтиҳон тизими бўйича чет тилидан ўтказилган имтиҳон мазкур Низомнинг 11-иловасида назарда тутилган мезонларга асосан баҳоланади.

4-боб. Олий ҳарбий таълим муассасасига қабул қилиш

49. Олий ҳарбий таълим муассасасига қабул қилиш Вазирлар Маҳкамасининг 2014 йил 3 июндаги 141-сонли қарори билан тасдиқланган Ўзбекистон Республикаси олий ҳарбий таълим муассасаларига танлаш тартиби ва қабул қилиш қоидалари тўғрисидаги низомга мувофиқ амалга оширилади.

50. Олий ҳарбий таълим муассасасининг қабул комиссияси 15 июлда номзодларни ўқишга қабул қилиш масаласини кўриб чиқади ва мазкур Низомнинг 12-иловасига мувофиқ шаклдаги протоколни расмийлаштиради. Маз-

кур протокол номзодларни олий ҳарбий таълим муассасасига ўқишга қабул қилиш тўғрисидаги буйруқларни расмийлаштириш учун асос ҳисобланади.

51. Олий ҳарбий таълим муассасасига ўқишга қабул қилинган ҳарбий хизматчиларга ўз хизмат ўташ жойларига тақдим этиш учун уларнинг ўқишга қабул қилинганлиги бўйича буйруқдан кўчирма берилади.

52. Тест синовлари натижаси бўйича берилган апелляция шикоятлари Ўзбекистон Республикаси олий ҳарбий таълим муассасаларига тингловчи ва курсантларни ўқишга қабул қилишда тест синовларини ўтказиш тартиби тўғрисидаги низомга (рўйхат рақами 2477, 2013 йил 12 июль) мувофиқ кўриб чиқилади.

5-боб. Яқуний қоидалар

53. Олий ҳарбий таълим муассасасининг қабул комиссияси номзодлар белгиланган қоидаларга, ҳарбий ва хизмат интизомига риоя қилмаган тақдирда уларни ўқишга қабул қилиш бўйича танлашнинг исталган босқичида четлатиш ҳуқуқига эга.

54. Олий ҳарбий таълим муассасасига ўқишга кирмаган номзодларнинг шахсий ҳужжатлари йиғма жилдлари тест синовлари натижалари эълон қилинган кундан эътиборан 5 кун ичида тегишли мудофаа ишлари бўйича бўлимлар ва ҳарбий қисмларга (муассасаларга) қайтариб юборилади.

55. Номзодни ўқишга қабул қилиш учун асос бўлган ҳужжатлар тегишли олий ҳарбий таълим муассасасида сақланади.

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
1-ИЛОВА

Мен, _____ га ўқишга
(олий ҳарбий таълим муассасасининг номи)

киришга номзод, _____ ушбу таълим
(Ф.И.О.)

муассасасига ўқишга қабул қилинсам ва ўқишни тамомлагандан сўнг мен билан тузиладиган шартнома талабларини бажармаганлигим сабабли, захирага бўшатишсам, шартномани муддатидан илгари бекор қилсам ёки содир этган жиноятим учун озодликдан маҳрум этилсам моддий масъуллигим тўғрисида огоҳлантирилдим.

_____ (имзо) _____ (Ф.И.О.)

20__ йил «____» _____

Биз, _____ га ўқишга
(олий ҳарбий таълим муассасасининг номи)

киришга номзоднинг ота-онаси, фарзандимиз _____
(Ф.И.О.)

ушбу таълим муассасасига ўқишга қабул қилинса ва ўқишни тамомлагандан сўнг у билан тузиладиган шартнома талабларини бажармаганлиги сабабли, захирага бўшатиlsa, шартномани муддатидан илгари бекор қилса ёки содир этган жинояти учун озодликдан маҳрум этилса моддий масъуллигимиз тўғрисида огоҳлантирилдик.

(имзо) _____ (Ф.И.О.)

(имзо) _____ (Ф.И.О.)

20__ йил «__» _____

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
2-ИЛОВА

_____ га
(туман (шаҳар) мудофаа ишлари бўйича бўлими бошлиғи Ф.И.О.)

_____ да
(номзоднинг яшаш жойи)

ЯШОВЧИ _____
(номзоднинг туғилган йили ва санаси)

_____ дан
(Ф.И.О.)

А Р И З А

Мени, ўз хоҳишимга кўра _____ га
(олий ҳарбий таълим муассасасининг номи ва мутахассислиги)

ўқишга кириш учун номзодлар рўйхатига киритишингизни сўрайман.

Тест синовларини _____ тилида _____ алифбосида топшираман.
(ўзбек, қорақалпоқ, рус) (кирилл, лотин)

Чет тили бўйича тест синовларини (имтиҳонни) _____ тилида топшираман.

Хизмат заруратига кўра лозим топилган жойда хизмат қилишга тайёр-

ман. Хизмат бўйича менга маълум бўлган давлат, ҳарбий ва хизматга оид маълумотларни сир сақлашга ваъда бераман.

_____ (имзо)

_____ (Ф.И.О.)

20__ йил «____» _____

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
3-ИЛОВА

_____га
(номзоднинг бевосита бошлиғининг лавозими)

БИЛДИРГИ

Мен _____,
(ҳарбий хизматчининг ҳарбий унвони, Ф.И.О., лавозими, туғилган йили, санаси ва жойи,
ҳарбий хизматга чақирилган йили ва санаси)

Сиздан ўз хоҳишимга кўра мени _____га
(олий ҳарбий таълим муассасасининг номи ва мутахассислиги)

ўқишга кириш учун номзод сифатида юқори қўмондонликка тавсия этишин-
гизни сўрайман.

Тест синовларини _____ тилида _____ алифбосида топшираман.
(ўзбек, қорақалпоқ, рус) (кирилл, лотин)

Чет тили бўйича тест синовларини (имтиҳонни) _____ тили-
да топшираман.

Хизмат заруратига кўра лозим топилган жойда хизмат қилишга тайёр-
ман. Хизмат бўйича менга маълум бўлган давлат, ҳарбий ва хизматга оид
маълумотларни сир сақлашга ваъда бераман.

_____ (лавозими)

_____ (ҳарбий унвони)

_____ (имзо)

_____ (Ф.И.О.)

20__ йил «____» _____

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
4-ИЛОВА

**Якка тартибдаги суҳбат
БАРАҚАСИ**

(Номзоднинг Ф.И.О. (ҳарбий хизматчининг унвони ва лавозими ҳам кўрсатилади))

Номзоднинг оилавий аҳволи: _____

Номзоднинг ота-онаси, яқин қариндошларининг ҳарбий хизматга муносабати: _____

Офицер касбини танлашининг сабаблари ва асослари: _____

Номзоднинг таълим муассасасидаги ўзлаштириш даражаси: _____

Номзоднинг хорижий тилни эгаллаганлик даражаси: _____

Номзод ҳақидаги қўшимча маълумотлар: _____

Ўзбекистон Республикаси Мудофаа вазирлигининг олий ҳарбий таълим муассасаларига ўқишга қабул қилиш тартиби тўғрисида батафсил тушунтирилди.

якка тартибдаги суҳбат ўтказган шахс:

(лавозими)

(ҳарбий унвони)

(имзо)

(Ф.И.О.)

20__ йил «____» _____

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
5-ИЛОВА

Индивидуал-психологик ўрганиш МЕТОДИКАСИ

1-боб. Умумий қоидалар

1. Индивидуал-психологик ўрганиш номзодларни мазкур Методикада белгиланган тартибда психологик тест синовидан ўтказиш орқали амалга оширилади.

2. Психологик тестлар, уларнинг жавоблари, баҳолаш мезонлари ва жавоблар бланклари олий ҳарбий таълим муассасалардаги ўқишнинг ўзига хослиги ҳисобга олинган ҳолда қоида тариқасида, ҳар уч йилда бир маротаба Ўзбекистон Республикаси Мудофаа вазирлигининг Ижтимоий-психологик тадқиқотлар маркази томонидан қайта ишлаб чиқилиб, Ўзбекистон Республикаси Мудофаа вазирлиги томонидан тасдиқланади ҳамда ҳар йили психологик тест синовлари бошлангунга қадар индивидуал-психологик ўрганиш бўйича кичик комиссия раисига юборилади.

3. Психологик тестлар, уларнинг жавоблари, баҳолаш мезонлари ва жавоблар бланклари индивидуал-психологик ўрганиш бўйича кичик комиссия раисида сақланади ва у тестлар ва жавобларининг ошкор бўлиб кетмаслиги учун масъул ҳисобланади.

4. Дастлаб номзодлар индивидуал-психологик ўрганиш бўйича кичик комиссия таркибига киритилган мутахассислар томонидан индивидуал-психологик ўрганишни ўтказиш тартиби, шунингдек ҳар бир вазифа бўйича тайёрланган тестларни ечганлик учун назарда тутилган баҳолаш мезонлари билан таништирилади ҳамда тегишли йўл-йўриқлар берилади.

2-боб. Индивидуал-психологик ўрганишни ўтказиш

5. Индивидуал-психологик ўрганиш якка тартибда ёки гуруҳ бўлиб ўтказилиши мумкин.

6. Индивидуал-психологик ўрганиш гуруҳ бўлиб ўтказилганда, хонада номзодлар 40 нафардан ортиқ бўлмаслиги зарур.

7. Индивидуал-психологик ўрганиш давомида номзодларга бир нечта вазифа бўйича психологик тестлар берилади.

8. Психологик тестлар номзодларнинг қуйидаги индивидуал-психологик хусусиятларини аниқлашга йўналтирилади:

ақл заковати, умумий интеллектуал салоҳияти ва хотираси;

мантикий фикрлаши, зийраклиги, тафаккур шаклларининг ривожланганлик даражаси, фикрлаш тезлиги ва таҳлил қилиш қобилиятлари;

шахсига хос индивидуал хусусиятлари, киришимлилиги, психик турғунлиги, самимийлиги;

касбни танлашининг мақсади ва мақсадининг барқарорлиги.

9. Психологик тест бошлангунга қадар номзоднинг соғлиғи суриштирилади. Ўзини ёмон ҳис қилаётганидан шикоят қилган номзодлар ўрганишга қўйилмайди. Бундай ҳолатда далолатнома тузилади ва унга кейинги индивидуал-психологик ўрганишдан ўтиш учун қайта рухсат берилади.

10. Жавоблар варақасининг тўғри тўлдирилиши учун номзод шахсан жавобгар ҳисобланади.

11. Психологик тест синовлари ўтказиладиган хонага микрокалькулятор, луғат, жадвал, китоб, уяли телефон, компьютер, телекоммуникация воситалари олиб кириш ва улардан фойдаланиш тақиқланади.

12. Психологик тест ўтказиш вақтида ўрганиш ўтказаётган шахслар номзодларни узлуксиз равишда кузатиб туради.

13. Барча топшириқлар бажариб бўлингандан сўнг, номзодлар жавоблар бланкаларини ўрганиш ўтказаётган мутахассислардан бирига топширади. Ўрганиш ўтказган мутахассислар жавоблар бланкаларини қабул қилишда уларнинг тўғри тўлдирилганлигига эътибор бериши зарур.

14. Вазифаларнинг барчасини муваффақиятли топширган номзод олий ҳарбий таълим муассасасига кириш учун тавсия этилади ҳамда унга дастлабки танлашнинг кейинги тадбирларида иштирок этиш учун рухсат берилади.

15. Вазифаларни муваффақиятли топшира олмаган номзоднинг такрорий тест синовларидан ўтишига йўл қўйилмайди.

3-боб. Якуний қоидалар

16. Индивидуал-психологик ўрганиш синовларини топширган номзодларга қайднома расмийлаштирилади.

17. Мазкур қайдномада номзодлар томонидан тўпланган баллар ва индивидуал-психологик ўрганиш бўйича хулоса акс этирилади.

18. Қайднома индивидуал-психологик ўрганиш бўйича кичик комиссия раиси ва аъзолари томонидан имзоланади.

19. Индивидуал-психологик ўрганиш натижаларидан норози бўлган номзод, унга нисбатан берилган хулосани асослантирувчи маълумот билан танишиш ҳуқуқига эга.

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
6-ИЛОВА

Умумжисмоний тайёргарлик даражасини баҳолаш МЕТОДИКАСИ

1-боб. Умумий қоидалар

1. Номзодларнинг умумжисмоний тайёргарлиги даражаси уларнинг мазкур Методикада назарда тутилган тегишли машқларни бажаришини текшириш орқали баҳоланади.

2. Номзодларга дастлаб машқларни бажаришга қўйиладиган талаблар ва мезонлар ҳамда машқларни бажариш тартиби номзодларнинг умумжисмоний тайёргарлик кўрганлигини баҳолаш бўйича кичик комиссияси таркибига киритилган мутахассислар томонидан тушунтирилади.

3. Номзодлар умумжисмоний тайёргарлик даражасини баҳолаш тадбирларига:

фуқаро ёшлар спорт кийимида;
ҳарбий хизматчилар ҳарбий кийимда келишлари лозим.

4. Номзодлар қуйидаги машқларни бажаради:

турникда тортилиш;
100 метрга югуриш;
3000 метрга югуриш.

5. Машқлар оралиғида номзодларга дам олиш учун камида 10 дақиқа вақт берилади.

6. Белгиланган машқларни узрсиз сабабларга кўра топширмаган ёхуд топширишдан бош тортган номзодлар қониқарсиз баҳоланади.

2-боб. Машқларни бажаришга қўйиладиган талаблар ва мезонлар

7. Турникда тортилиш машқини бажаришда:

бош бармоқ поя ичкарасидан ушланади, тана бироз ростланади, тизза бўғими тўғирланади, оёқ учлари чўзилади, товонлар бирлаштирилади;
ияк турник поясидан ўтгунга қадар қўллар букилади;
ҳаракат тўлиқ амалга оширилиши билан дастлабки ҳолатга қайтилади (осилиш ҳолати 1-2 сония давом этади).

Ушбу машқни бажаришда оёқларни кериш, танани ҳаракатсиз ҳолатда ёғиш ҳамда оёқлар билан силтанма ҳаракатлар қилиш тақиқланади.

Жуфт тутилган оёқларни 45° гача букишга рухсат берилади.

8. Номзодларнинг турникда тортилиш машқни тўрт босқичли тизимда қуйидагича баҳоланади:

а) фуқаро ёшлар учун:

12 маротаба ва ундан кўп тортилганда — «аъло»;

10-11 маротаба тортилганда — «яхши»;

8-9 маротаба тортилганда — «қониқарли»;

1 — 7 маротаба ёхуд умуман тортила олмаганда — «қониқарсиз» деб баҳоланади.

б) ҳарбий хизматчилар учун:

14 маротаба ва ундан кўп тортилганда — «аъло»;

12-13 маротаба тортилганда — «яхши»;

10-11 маротаба тортилганда — «қониқарли»;

1 — 9 маротаба тортилганда ёхуд умуман тортила олмаганда — «қониқарсиз» деб баҳоланади.

9. 100 метрга югуриш машқи:

юқори ёки қуйи стартдан амалга оширилади;

стадионнинг югуриш йўлакчаси ёки қаттиқ қопламли текис жойларда ўтказилади.

10. Номзодларнинг 100 метрга югуриш машқи тўрт босқичли тизимда қуйидагича баҳоланади:

а) фуқаро ёшлар учун:

14,0 сония ичида бажарган тақдирда — «аъло»;

14,1 — 14,4 сонияда бажарган тақдирда — «яхши»;

14,5 — 15,0 сонияда бажарган тақдирда — «қониқарли»;

15,1 сонияда ва ундан кўп вақтда бажарган тақдирда — «қониқарсиз» деб баҳоланади.

б) ҳарбий хизматчилар учун:

14,0 сония ичида бажарган тақдирда — «аъло»;

14,1 — 14,4 сонияда бажарган тақдирда — «яхши»;

14,5 — 15,2 сонияда бажарган тақдирда — «қониқарли»;

15,3 сонияда ва ундан кўп вақтда бажарган тақдирда — «қониқарсиз» деб баҳоланади.

11. 3000 метрга югуриш машқлари стадионнинг югуриш йўлакчалари ёки текис жойларда, умумий ёки алоҳида старт берилган ҳолда ўтказилади. Старт ва марра чизиқлари бир жойда белгиланиши мумкин.

12. Номзодларнинг 3000 метрга югуриш машқи тўрт босқичли тизимда қуйидагича баҳоланади:

а) фуқаро ёшлар учун:

12,40 дақиқа ичида бажарган тақдирда — «аъло»;

12,40 дақиқадан кўп, бироқ 13,20 дақиқагача бажарган тақдирда — «яхши»;

13,20 дақиқадан кўп, бироқ 14,0 дақиқагача бажарган тақдирда — «қониқарли»;

14,0 дақиқадан кўп вақтда бажарган тақдирда — «қониқарсиз» деб баҳоланади.

б) ҳарбий хизматчилар учун:

12,40 дақиқа ичида бажарган тақдирда — «аъло»;

12,40 дақиқадан кўп, бироқ 13,0 дақиқагача бажарган тақдирда — «яхши»;

13,0 дақиқадан кўп, бироқ 13,35 дақиқагача бажарган тақдирда — «қоникарли»;

13,35 дақиқадан кўп вақтда бажарган тақдирда — «қоникарсиз» деб баҳоланади.

13. Номзодларнинг умумжисмоний тайёргарлик даражасини баҳолашда камида битта «қоникарсиз» баҳо олган бўлса, умумжисмоний тайёргарлик синовларидан «ўтмаган» деб ҳисобланади.

14. Умумжисмоний тайёргарлик синовларидан ўтмаган номзодларга машқларни такрорий бажаришга рухсат берилмайди.

3-боб. Яқуний қоидалар

15. Умумжисмоний тайёргарлик синовларини топширган номзодларга қайднома расмийлаштирилади.

16. Мазкур қайдномада номзодлар томонидан бажарилган машқлар ва улар учун қўйилган баҳолар кўрсатилади.

17. Қайднома номзодларнинг умумжисмоний тайёргарлик кўрганлигини баҳолаш бўйича кичик комиссия раиси ва аъзолари томонидан имзоланади.

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
7-ИЛОВА

Психофизиологик ўрганиш МЕТОДИКАСИ

1-боб. Умумий қоидалар

1. Психофизиологик ўрганиш номзоднинг психофизиологик хислатлари ва индивидуал хусусиятларини аниқлаш мақсадида автоматлаштирилган психофизиологик комплекслар (бундан буён матнда махсус комплекс деб юритилади) ёрдамида ўтказилади.

2. Номзодларни психофизиологик ўрганиш махсус комплекс ёрдамида ўтказилишининг асосий тамойили — номзоднинг психофизиологик хусусияти бўйича хулоса қилишда инсон омилидан холи бўлиш ва субъективликдан сақланиш ҳисобланади.

3. Номзодларга психофизиологик ўрганиш ўтказишдан олдин мазкур Методикада назарда тутилган психофизиологик ўрганиш ўтказиш тартиби, махсус комплекснинг техник хусусиятлари ва хавфсизлик нуқтаи назари-

дан ўзини қандай тутиши лозимлиги тушунтирилади ҳамда тегишли йўл-йўриқлар берилади.

2-боб. Психофизиологик ўрганишни ўтказиш ва унинг хулосаси

4. Психофизиологик ўрганиш ҳар бир номзод учун алоҳида ўтказилади.
5. Психофизиологик ўрганиш махсус жиҳозланган хонада ўтказилади.
6. Ушбу хона:
 - етарли даражада табиий ва сунъий ёритилган бўлиши;
 - шовқиндан ҳимояланган бўлиши;
 - номзодга ажратилган жой қулай бўлиши лозим.
7. Психофизиологик ўрганиш ўтказиладиган хонага фақат бир нафар номзод қўйилади.
8. Кичик комиссия раиси номзоднинг шахсини тасдиқловчи ҳужжатини шахсан текшириб, уни жойига ўтқизади.
9. Психофизиологик ўрганишда номзоднинг қўлларига махсус комплекснинг электродлари уланади ва мазкур электродлар орқали 10 дақиқагача бўлган вақт давомида кичик қувватли электр импульслар узатилади.
10. Психофизиологик ўрганиш давомида номзод билан мулоқотга киришишга йўл қўйилмайди.
11. Психофизиологик ўрганиш номзоднинг ҳиссий (соматик), психоэмоционал ҳолати яхши бўлгандагина ўтказилиши лозим.
12. Психофизиологик ўрганиш бошланишидан олдин ўзини ёмон ҳис қилаётган ёки соғлиғидан шикоят қилаётган номзодлар мазкур тадбирга қўйилмайди. Бундай ҳолатда далолатнома тузилади ва номзодга кейинги гуруҳлар таркибида психофизиологик ўрганишдан ўтиш учун қайта рухсат берилади.
13. Психофизиологик ўрганиш вақтида уни ўтказаетган шахс номзодни узлуксиз равишда кузатиб туради.
14. Номзоднинг психофизиологик ўрганиш натижаси махсус комплекснинг автоматик равишда чиқариб берадиган хулосаси ҳисобланади.

3-боб. Яқуний қоида

15. Психофизиологик ўрганиш натижаси (хулосаси) уни ўтказган шахс томонидан имзоланади ва олий ҳарбий таълим муассасасининг қабул комиссияси раисига топширилади.

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
8-ИЛОВА

Ёзма иш (диктант) ўтказиш МЕТОДИКАСИ

1-боб. Умумий қоидалар

1. Ёзма иш диктант ёздириш йўли билан номзоднинг орфографик ва пунктуацион саводхонлигини баҳолаш мақсадида ўтказилади.

2. Диктантларнинг мавзулари ва матнлари олий ҳарбий таълим муассасаси қабул комиссияси таркибидаги ёзма иш (диктант) ўтказиш бўйича кичик комиссия томонидан 1 июнь кунига қадар шакллантирилади, қабул комиссияси раиси томонидан тасдиқланади ва зарур миқдорда кўпайтирилади.

3. Диктантларнинг мавзулари ва матнлари кичик комиссия раисининг сейфида сақланади ҳамда у уларнинг ошкор қилинмаслиги учун шахсан жавобгар ҳисобланади.

4. Номзодларга дастлаб мазкур Методикада назарда тутилган ёзма иш (диктант) ўтказиш тартиби тушунтирилади.

5. Номзодларга ёзма ишни қайта топширишга рухсат берилмайди. Диктант қандай баҳоланишидан қатъи назар, номзод якка тартибдаги якуний суҳбатга қўйилади.

6. Диктантлар текшириб чиқилгандан сўнг, баҳоланган ҳолда ёзма иш (диктант) ўтказиш бўйича кичик комиссия раиси томонидан қабул комиссияси масъул котибига топширилади.

7. Диктант ўтказиладиган аудиторияга лугат, китоблар, уяли телефон, компьютер, телекоммуникация воситалари ва шпаргалкалар олиб кириш тақиқланади.

2-боб. Диктантга қўйиладиган талаблар ва мезонлар

8. Диктант учун умумий ўрта, ўрта махсус ёки касб-хунар таълими фан дастурлари доирасида ўтилган мавзуларга мувофиқ келадиган ва номзоднинг олган билимларини аниқлаш имкониятини берадиган материаллар танланади.

9. Диктант матнининг ҳажми 90 — 120 та сўздан иборат бўлади.

10. Диктант ёзишдан олдин номзодларга диктант матни тўлиқ ўқиб эшиттирилади.

Диктант ёзиш вақтида ҳар бир гап ўқиб эшиттирилгандан сўнг, ушбу гапни ёзишга киришилади. Ушбу гап ёзиб бўлингандан сўнг, гап яна бир бор ўқиб эшиттирилади.

11. Номзодларнинг диктанти «5» баллик тизимда қўйидагича баҳоланади:

мутлақо хатосиз ёзилган ёки иккита орфографик ёхуд пунктуацион хатога йўл қўйилган диктантга — 5 балл;

учтадан олтигача орфографик ёки пунктуацион хатога йўл қўйилган диктантга — 4 балл;

еттитадан тўққизтагача орфографик ёки пунктуацион хатога йўл қўйилган диктантга — 3 балл;

ўнтадан ўн иккитагача орфографик ёки пунктуацион хатога йўл қўйилган диктантга — 2 балл;

ўн уч ва ундан ортиқ орфографик ёки пунктуацион хатога йўл қўйилган диктантга — 1 балл қўйилади.

12. Қўйидаги мезонлар мавжуд бўлганда хатолар, уларнинг сонидан қатъи назар, битта хато деб топилади:

бешта сўзда «х» ёки «ў» ҳарфлари ўрнида тегишлича «х» ёки «у» ҳарфлари ёзилган бўлса;

кириш сўзларнинг (масалан, дарвоқе, дарҳақиқат) ёзилишида олтигача пунктуацион хатога йўл қўйилган бўлса;

қаратқич белгиси учтагача сўзда нотўғри қўлланилган бўлса.

13. Қўйидагилар хато деб ҳисобланмайди:

тасодиқий хатолар (масалан, тушунмоқ сўзи барча ўринларда тўғри ёзилган, бироқ битта ўринда нотўғри ёзилган ёки «1441» ўрнига «1941» ёзилган бўлса);

такрорий хатолар (масалан, «кутулмоқ» сўзи беш ўринда «кутилмоқ» тарзида қўлланилган бўлса);

сўз кўчиришдаги хатолар (масалан, воқе-а ёки октя-брь);

айрим атамаларнинг ёзилишидаги хатолар (масалан, Юнусобод — Юнус-обод).

3-боб. Якуний қоидалар

14. Текширилган ҳар бир диктантга олий ҳарбий таълим муассасаси қабул комиссияси таркибидаги ёзма иш (диктант) ўтказиш бўйича кичик комиссия раиси ва диктантни текширган аъзоси томонидан имзо қўйилади. Бунда кичик комиссия аъзолари ўзлари диктант ёздирган номзодларнинг диктантларини текшириши тақиқланади.

15. Кичик комиссия иши якунлангач, номзодларнинг диктантлари кичик комиссия раиси томонидан олий ҳарбий таълим муассасасининг қабул комиссияси раисига топширилади.

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
9-ИЛОВА

**Компьютер техникасини ва ахборот-коммуникация
технологияларини эгаллаб олганлик даражасини текшириш
МЕТОДИКАСИ**

1-боб. Умумий қоидалар

1. Номзоднинг компьютер техникасини ва ахборот-коммуникация технологияларини (бундан буён матнда КТ ва АКТ деб юритилади) эгаллаб олганлик даражаси компьютер дастурига киритилган тест саволларини бериш йўли билан текширилади.

2. Номзодларнинг КТ ва АКТни эгаллаб олганлик даражасини текширишдан олдин уларга мазкур Методикада назарда тутилган текшириш ўтказиш тартиби тушунтирилади ҳамда тегишли йўл-йўриқлар берилади.

3. Тест саволлари, уларнинг жавоблари олий ҳарбий таълим муассасалари қабул комиссиялари таркибидаги компьютер техникасини ва ахборот-коммуникация технологияларини эгаллаб олганлик даражасини текшириш бўйича кичик комиссия томонидан 1 июнь кунига қадар ишлаб чиқилади, қабул комиссияси раиси томонидан тасдиқланади ва тегишли компьютерлар дастурига киритилади.

4. Тест саволлари ва уларнинг жавоблари ошкор қилинмаслиги учун кичик комиссия раиси жавобгар ҳисобланади.

**2-боб. КТ ва АКТни эгаллаб олганлик даражасини
текшириш**

5. Номзодга ўттизта тест саволи ва уларни ечиш учун бир соат вақт берилади. Номзодга тест синовларини қайта топширишга рухсат берилмайди.

6. Тест синовлари ўтказилаётган аудиторияга лугат, китоблар, уяли телефон, компьютер, телекоммуникация воситалари ва шпаргалкалар олиб кириш тақиқланади.

7. Тест саволларини шакллантиришда умумий ўрта, ўрта махсус ёки касб-ҳунарга таълими фан дастурларига мувофиқ келадиган ва номзоднинг олган билимларини аниқлаш имкониятини берадиган материаллар танланади.

8. Тест саволлари қуйидагилар бўйича тузилади:

шахсий компьютердан фойдаланиш бўйича;

идора дастурий иловалари (microsoft office дастури) бўйича;

Интернет тармоғида, локал ва корпоратив тармоқларда ишлаш ва ташкилий техникадан фойдаланиш бўйича.

9. Тест синовлари натижаси «5» баллик тизимда қуйидагича баҳоланади:

26 — 30 та тест саволларига тўғри жавоб берилган бўлса — 5 балл;

21 — 25 та тест саволларига тўғри жавоб берилган бўлса — 4 балл;

16 — 20 та тест саволларига тўғри жавоб берилган бўлса — 3 балл;

11 — 15 та тест саволларига тўғри жавоб берилган бўлса — 2 балл;

1 — 10 та тест саволларига тўғри жавоб берилган бўлса — 1 балл;

тест саволларининг бирортасига ҳам тўғри жавоб берилмаган бўлса — 0 балл қўйилади.

3-боб. Якуний қоида

10. КТ ва АКТни эгаллаб олганлик даражасини текшириш натижалари бўйича номзодларга қайднома расмийлаштирилади.

11. Мазкур қайдномада номзодлар томонидан тест саволларига берилган тўғри жавоблар сони ва улар учун қўйилган баллар кўрсатилади.

12. Қайднома компьютер техникасини ва ахборот-коммуникация технологияларини эгаллаб олганлик даражасини текшириш бўйича кичик комиссия раиси ва аъзолари томонидан имзоланади.

Ўзбекистон Республикаси

Мудофаа вазирлигининг олий ҳарбий таълим муассасаларига ўқишга қабул қилиш тартиби тўғрисидаги низомга

10-ИЛОВА

Якка тартибдаги якуний суҳбат ўтказиш МЕТОДИКАСИ

1-боб. Умумий қоидалар

1. Якка тартибдаги якуний суҳбат номзоднинг олий ҳарбий таълим муассасасига ўқишга кириши сабабини, етакчилик фазилатларини, ақлий қобилиятлари ва бошқа муҳим профессионал фазилатларини аниқлаш мақсадида ягона методика бўйича психофизиологик ўрганиш, ёзма иш (диктант) натижалари, компьютер техникаси ва ахборот-коммуникация технологияларини эгаллаб олганлик даражасини текшириш натижалари асосида ўтказилади.

2. Номзодларга якка тартибдаги якуний суҳбат ўтказиш бўйича тушунчалар, суҳбат давомида берилиши мумкин бўлган саволларнинг умумий йўналишлари ва қабулга оид бошқа зарур маълумотлар ҳарбий-профессионал танлаш тадбирлари бошланишидан олдин олий ҳарбий таълим муассасасининг қабул комиссияси томонидан берилади.

3. Якка тартибдаги якуний суҳбат давомида номзодларга бериладиган

саволлар рўйхати олий ҳарбий таълим муассасалари қабул комиссиялари томонидан 1 июнь кунига қадар шакллантирилади ва қабул комиссияси раиси томонидан тасдиқланади.

4. Саволлар номзоднинг ўқишга кириш сабабини, етакчилик фазилатларини, ақлий қобилиятини, дунёқарашини ва бошқа муҳим профессионал фазилатларини аниқлашга йўналтирилган бўлиши лозим.

5. Саволлар рўйхати олий ҳарбий таълим муассасалари қабул комиссияси масъул котибининг сейфида сақланади. Масъул котиб саволларнинг ошкор қилинмаслиги учун жавобгар ҳисобланади.

2-боб. Якуний суҳбат ўтказиш

6. Якка тартибдаги якуний суҳбат коллегиал принцип бўйича, олий ҳарбий таълим муассасаларининг қабул комиссиялари томонидан ўтказилади.

7. Номзод якуний суҳбатга шахсини тасдиқловчи ҳужжати билан кирилади.

8. Қабул комиссияси аъзоларига масъул котиб (унинг ёрдамчиси) томонидан якка тартибдаги якуний суҳбатдан ўтказилаётган номзод ҳақидаги барча маълумотлар тақдим этилади.

9. Комиссия аъзолари номзод ҳақидаги умумий маълумотларни ўрганиб чиқиб, унга оғзаки тарзда 3 — 5 та савол беради.

10. Ҳар бир номзодга 10 дақиқагача вақт ажратилади. Номзоднинг барча саволларга берган жавоби эшитилгандан сўнг, унга аудиториядан чиқишга рухсат берилади.

3-боб. Якуний суҳбат натижаларини аниқлаш

11. Номзодлар саволларга берган жавобларига қараб қуйидаги мезонлар асосида «5» баллик тизимда баҳоланади:

номзод тўғри хулоса ва қарор қабул қилади, ижодий фикрлай олади, мустақил мушоҳада юритади, амалда қўллай олади, моҳиятини тушунади, билади ва айтиб беради деб топилганда — 5 балл;

номзод мустақил мушоҳада юритади, амалда қўллай олади, моҳиятини тушунади, билади, айтиб беради ва тасаввурга эга деб топилганда — 4 балл;

номзод моҳиятини қисман тушунади, билади, айтиб беради ва тасаввурга эга деб топилганда — 3 балл;

номзод билмайди, айтиб бера олмайди ва тасаввурга қисман эга деб топилганда — 2 балл;

номзод билмайди, айтиб бера олмайди ва тасаввурга эга эмас деб топилганда — 0 балл қўйилади.

12. Номзоднинг саволларга жавоби эшитилгандан сўнг, комиссиянинг ҳар бир аъзоси номзодга ўзининг баҳосини қўяди. Комиссия аъзолари томонидан қўйилган баҳолар муҳокама қилиниб, ҳар бир номзодга якка тартибдаги якуний суҳбат натижалари бўйича мазкур Методиканинг иловасига мувофиқ шаклдаги қайдномага ўртача арифметик балл қўйилади.

Мазкур қайдномага номзоднинг психофизиологик ўрганиш, ёзма иш (диктант), компьютер техникасини ва ахборот-коммуникация технологияларини эгаллаб олганлик даражаси натижалари ҳам қабул комиссияси масъул котиби томонидан ёзиб қўйилади.

13. Қўйилган барча баллар умумлаштирилиб, номзоднинг ўртача арифметик баҳоси аниқланади.

14. Натижалар шу куннинг ўзида номзодларга эълон қилинади.

4-боб. Якуний қоидалар

15. Якка тартибдаги якуний суҳбат натижалари бўйича ўртача уч ва ундан юқори балл тўплаган номзодлар Ўзбекистон Республикаси Вазирлар Маҳкамаси ҳузуридаги Давлат тест маркази томонидан ўтказиладиган тест синовларини топширишга қўйилади.

16. Номзодни Ўзбекистон Республикаси Вазирлар Маҳкамаси ҳузуридаги Давлат тест маркази томонидан ўтказиладиган тест синовларини топширишга қўйиш ёки қўймаслик тўғрисидаги қарор ҳақида қайдномага ёзиб қўйилади.

Якка тартибдаги якуний суҳбат
ўтказиш методикасига
ИЛОВА

Якка тартибдаги якуний суҳбат натижалари бўйича ҚАЙДНОМА

Номзод _____
(Ф.И.О.)

Топшириш жойи: _____

Топшириш санаси: 20__ йил ____ _____.

Психофизиологик ўрганиш натижаси бўйича қўйилган балл	Ёзма иш (диктант) натижаси бўйича қўйилган балл	Компьютер техникасини ва ахборот-коммуникация технологияларини эгаллаб олганлик даражасини текшириш натижаси бўйича қўйилган балл	Якка тартибдаги якуний суҳбат натижаси бўйича қўйилган балл	Ўртача арифметик балл

Қабул қилинган қарор: _____

Қабул комиссияси раиси _____
(имзо) (ушвони ва Ф.И.О.)

Қабул комиссияси аъзолари:

_____	_____
(имзо)	(унвони ва Ф.И.О.)
_____	_____
(имзо)	(унвони ва Ф.И.О.)
_____	_____
(имзо)	(унвони ва Ф.И.О.)

Қабул комиссияси масъул котиби _____

(имзо) _____ (унвони ва Ф.И.О.)

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
11-ИЛОВА

**Ягона кўп балли имтиҳон тизими бўйича чет тилидан
имтиҳонни баҳолаш
МЕЗОНЛАРИ**

1. Имтиҳон тест синовлари мажмуасида фаннинг эгаллаган ўрнини ҳисобга олган ҳолда 75,6 балл ёки 39,6 балл оралиғида ягона кўп балли тизим бўйича баҳоланади.

2. Имтиҳонда тегишли чет тили бўйича номзодларга 36 та тест саволлари берилади ва уларни ечиш учун 1 соат вақт ажратилади.

3. Тест синовлари мажмуасида фан бўйича 75,6 балл қўйилиши назарда тутилган бўлса, ҳар бир тўғри белгиланган жавоб учун 2,1 балл қўйилади.

4. Тест синовлари мажмуасида фан бўйича 39,6 балл қўйилиши назарда тутилган бўлса, ҳар бир тўғри белгиланган жавоб учун 1,1 балл қўйилади.

5. Номзоднинг жавоблари қабул қилингандан сўнг, комиссия аъзолари томонидан ҳар бир номзод томонидан берилган тўғри жавобга қараб умумий балл чиқарилади ва натижалари бўйича қайднома расмийлаштирилади.

6. Мазкур қайдномада номзодлар томонидан тест саволларига берилган тўғри жавоблар сони ва улар учун қўйилган баллар кўрсатилади.

7. Қайднома комиссия раиси ва аъзолари томонидан имзоланади.

Ўзбекистон Республикаси
Мудофаа вазирлигининг олий ҳарбий таълим
муассасаларига ўқишга қабул қилиш тартиби
тўғрисидаги низомга
12-ИЛОВА

«ТАСДИҚЛАЙМАН»

(олий ҳарбий таълим муассасанинг номи, қабул
комиссияси раисининг унвони, имзоси ва Ф.И.О.)

20__ йил «__» _____

(олий ҳарбий таълим муассасанинг номи)

**қабул комиссияси йиғилишининг
ПРОТОКОЛИ**
_____-сон

20__ йил «__» _____

_____ (йиғилиш ўтказилган ҳудуд номи)

Раислик қилувчи:

_____ (қабул комиссияси раисининг унвони ва Ф.И.О.)

Қатнашганлар:

_____ (қабул комиссияси аъзолари)

_____ (қабул комиссияси аъзолари)

КУН ТАРТИБИ:

(номзодларни ўқишга қабул қилиш масаласини кўриб чиқиш тўғрисида)

_____ қабул комиссияси
(олий ҳарбий таълим муассасанинг номи)

Ўзбекистон Республикаси Вазирлар Маҳкамаси ҳузуридаги Давлат тест
маркази томонидан тақдим этилган тест синовлари натижаларини кўриб
чиқиб ҳамда Ўзбекистон Республикаси таълим муассасаларига қабул қилиш
бўйича Давлат комиссиясининг қарорига асосан **қарор қилади:**

_____ мутахассислиги бўйича танлов натижалари*:

Т/р	Номзоднинг Ф.И.О.	Номзоднинг махсус коди	Тест синовларида тўплаган балли	Имтиёз	Умумий балл	Ўқишга қабул қилинганлиги ёки қабул қилинмаганлиги ҳақида ёзув
1.						
2.						
3.						
4.						
5.						
6.						
...						

Қабул комиссияси аъзолари _____
(унвони, Ф.И.О.)

(унвони, Ф.И.О.)

Қабул комиссияси
масъул котиби:

(унвони, Ф.И.О.)

* Изоҳ: мазкур протоколда тегишли мутахассислик бўйича алоҳида танлов ўтказиладиган олий ҳарбий таълим муассасаси қабул комиссияси томонидан ўтказилган танлов натижалари ҳар бир мутахассислик бўйича алоҳида кўрсатилади.